

տեւ հնարս ինդրեր առն կնոջն կորստեան, ո՛ր գիտե՛ զկնի¹ Նորա նմա հնար լիցի յափշտակել:

8 Ապա Տիրիթն ի հնարս նենգութեան մտաներ, եւ բազում վարձեր իւր աւզնականս եւ սատարս, որով զիւր չարախաւսութիւնն² յառաջ վարել կարասցէ: 9 Եւ քսիս ստութեան զԳնելոյն նենգութեամբ առ թագաւորն Արշակ մատուցանէր՝ թէ Գնել թագաւորել կամի, եւ զքեզ սպանանել. եւ ամենայն մեծամեծք եւ նախարարք եւ ազատք սիրեն զԳնել, եւ ամենայն աշխարհիս նախարարք կամին զտերութիւն Նորա ի վերայ իւրեանց առաւել քան զքո: 10 Արդ, ասեն, գիտեա եւ տես, արքայ, զի՛նչ գործեսցես. որպէս եւ կամիս, զիարդ մարթասցիս ապրել: 11 Եւ այսպիսի բանիւք գրգռէին զթագաւորն Արշակ, մինչեւ հաստատէին ի միտս թագաւորին զիւրեանց ասացեալսն:

12 Ապա ռիսացեալ թագաւորն ընդ պատանեկին Գնելոյ, եւ բազում անգամ հալածական առներ զնա, եւ նիւթեալ լինէր նենգութիւն³ բազում ժամանակս: 13 Ապա զնաւասարդաց ժամանակաւն առնէր խորհուրդ թագաւորն Արշակ՝ կոչել առ ինքն զպատանեակն Գնել եւ սպանանել: 14 Ապա առաքէր զՎարդան զեղբայր սպարապետին զնահապետ ազգին Մամիկոնեան տոհմին, զի մեծաւ երդմամբ եւ նենգութեամբ կոչել կարասցէ, զի մի՛ խորհուրդն յայտնեսցի. գուցէ փախիցէ եւ ապրիցի. այլ զի պատրանաւք եւ հրապուրանաւք ածիցէ⁴ մինչեւ ի տեղին մահուն: 15 Եւ էր բանակ թագաւորին ի Շահապիվանի ի բուն բանակի տեղսն Արշակունեացն ի ներքոյ Սիւնեացն⁵ եւ ի վերայ ասպարիսացն: 16 Եւ առաքեալ զՎարդանն, զմեծ նահապետն յարքայէն Արշակայ, եկն եգիտ զպատանեակն Գնել ի մաւտաւոր տեղւոջն, այս ինքն ի գեւղն Առաւիտոց անուանեալ: 17 Մեծաւ ռիստիւ եւ բազում պատրանաւք զպատանեակն Գնել հանդերձ իւրով կնանն եւ դրամբն հաւանեցուցանէր երթալ հասանել ի բանակն արքունի. իբրեւ այն թէ ի մեծարանս ինչ զնա կոչիցէ թագաւորն, բազում խնդանաւք տարեալ հասուցանէր՝ թէ թագաւորն Արշակ ոչ կամեցեալ զտաւնս նաւասարդաց առանց քո անցուցանել, զի հաճեալ եւ քաղցրացեալ է ընդ քեզ, վասն զի ըստ բանից չարախաւսացն ոչ ինչ գտաւ ի քեզ չարութիւն. եւ եհաս ինքն ի վերայ, զի զուր այժմ ատեր զքեզ՝ որ ի նմանէն մեծ սիրոյ արժանի ես:

18 Ապա չուեաց ամենայն կազմութեամբն իւրով Գնել, երթեալ հասանէր ի բանակն արքունի զգիշերն ամենայն բազում փութով տազնապաւ: 19 Վասն զի վաղիւն հասելոյ առաւատուն արն լուսանայր կիւրակէն: 20 Եւ

1 Ի տպ. Պատկ. զկնի

2 Օրինակ մի՛ զիւր չարութիւն եւ զչարախաւսութիւնս

3 Օրինակ մի՛ նենգութեամբ

4 Օրինակ մի՛ պատրիցէ ածիցէ

5 Ի տպ. Պատկ. Սիւնեացն